


Visoki predstavnik Inzko susreo se sa generalnim tajnikom UN-a Guterresom



Nakon svog polugodišnjeg obraćanja Vijeću sigurnosti UN-a, visoki predstavnik Valentin Inzko jučer je, putem video veze, razgovarao sa generalnim tajnikom Ujedinjenih naroda Antóniom Guterresom. Visoki predstavnik mu je predočio akcente svoga izvješća Vijeću sigurnosti UN-a, te je razgovarao s njim o trenutnoj političkoj situaciji u Bosni i Hercegovini, sa naglaskom na predstojeće lokalne izbore i napore koje ova zemlja ulaže u borbi protiv pandemije Covid-19.

Visoki predstavnik je naglasio da je 25 godina nakon potpisivanja Daytonskog mirovnog sporazuma krajnje vrijeme početi sa zatvaranjem otvorene rane koje je prouzročio rat u BiH: "Pozitivna i ka budućnosti usmjerena retorika i koraci moraju zamijeniti planove podjele – budući da su pomirenje i međusobno uvažavanje jedini način za izgradnju boljeg života za sve građane ove zemlje".

S tim ciljem, visoki predstavnik je podcrtao usvajanje Revidirane strategije za procesuiranje ratnih zločina od strane Vijeća ministara BiH, prema kojoj bi najozbiljniji predmeti ratnih zločina trebali biti prioriteti za procesuiranje i okončanje do 2023. godine. Visoki predstavnik je dodao da će koordinacija, saradnja i discipliniran pristup pravosudnih institucija u BiH odrediti uspjeh nove strategije, te izrazio nadu da rezultat neće izostati.

Visoki predstavnik je također naglasio da su organi BiH nastojali usredsrediti napore na zaštitu ekonomije istovremeno se pripremajući za lokalne izbore 2020. godine. "Pandemija je još jednom apostrofirala dugotrajni problem u BiH, gdje neki političari i dalje nastoje provoditi političke planove o podjeli na račun ujedinjenih napora da se zaustavi širenje virusa i spriječe štetne posljedice po ekonomiju. Ova kriza je također pokazala da je BiH zavisna od međunarodne pomoći, što oslikava propust političkih elita da se fokusiraju na stvarna pitanja koja su bitna za građane BiH", rekao je visoki predstavnik.

On je također naglasio da "sada više nego ikada, u vrijeme kada je BiH usred globalne pandemije i pored izbjegličke krize, u nastojanjima da sačuvaju i ojačaju ekonomiju, organi vlasti moraju ispuniti svoja obećanja o izgradnji mirne i održive države koja je nepovratno na kursu euro-atlantskih integracija", dodao je visoki predstavnik.

Kao pozitivan razvoj situacije u posljednjih nekoliko mjeseci, visoki predstavnik je naveo veoma značajan domaći sporazum, postignut uz pomoć međunarodnih partnera, za izmjene Izbornog zakona BiH i omogućavanje održavanja lokalnih izbora, te na taj način i potvrđivanja minimalnih standarda demokracije u Mostaru, prvi put nakon 2008. godine.